

LEDSCHA

**DAVART L'ORGANISAZIUN
D'AGÜD IN CAS DA CATASTROFAS**

PEL

CUMÜN DA VALSOT



24.03.2015

I. Disposiziuns generalas

Art. 1 Scopo

A quista ledscha suottastan la preparaziun e la realisaziun da las masüras per proteger la populaziun cunter fenomens da la natüra destructivs (lavinias, inuondaziuns, auazuns e sumgliaints).

Cun la preschainta ledscha dessan gnir s-chaffidas las premissas per cha'l cumün saja preparà per tals cas e possa reagir optimalmaing in cas da tals fenomens.

Art. 2 Relaziun cul dret surordinà

La structura da l'organisaziun per la protecziun cunter fenomens da la natüra destructivs sco eir tuot las masüras ordinadas in quist connex han da correspuonder a las prescripziuns confuorm al dret surordinà da la confederaziun (ledscha davart la protecziun civila) e dal chantun (ledscha davart l'agüd in cas da catastrofas, ordinaziun davart la pulizia da fö, ledscha per promouver la chüra da personas amaladas).

Art. 3 Egualità da las schlattas

Denominaziuns da personas, funcziuns e professiuns in quista ledscha as referischan a tuottas duos schlattas, per quant chi nu resorta nüg'oter dal sen da la ledscha.

Art. 4 Princip

L'organisaziun per la protecziun cunter evenimaints da la natüra destructivs (organisaziun d'agüd in cas da catastrofas) cumpiglia tuot ils mezs, agens ed attribuits, chi vegnan dovrats per superar fenomens da la natüra destructivs.

Ella as basa süllas structuradas organisatoricas existentas dal cumün da Valsot ed accumulscha sias incumbenzas tras ün ingaschamaint coordinà e confuorm al temp.

Per quant chi nun es prescrit inguott'oter in quista ledscha o i'l dret surordinà, determinescha la suprastanza cumünala la structura e l'organisaziun da l'organisaziun d'agüd in cas da catastrofas e cumpilescha sün proposta dal stab da catastrofas ün organigram ed ün quadern da dovoirs.

Tuot las activitats da l'organisaziun d'agüd in cas da catastrofas vegnan attribuidas al cumün.

Art. 5 Incumbenza generala

A l'organisaziun d'agüd in cas da catastrofas suottastan in princip tuot las acziuns chi güdan a superar situaziuns extraordinarias o catastrofas sco consequenza d'evenimaints da la natüra destructivs, specialmaing:

- a) Prevenziun ed orientaziun da la populaziun;
- b) Sgürezza da la populaziun, da las valuors realas e da l'ambiant;
- c) Minimizar dons;
- d) Restabilir plü svelt pussibel üna situaziun ordinada.

Art. 6 Responsabilità persunala

L'organisaziun d'agüd in cas da catastrofas nu deliberescha a la populaziun e'ls giasts da la responsabilità persunala.

Minchün es oblià d'applichar las cugnuschentschas las plü elementaras davart las forzas da la natüra e da tour svesa tuot las masüras da precauziun chi pon gnir pretaisas.

II L'organisaziun d'agüd in cas da catastrofas

A. Stab da catastrofas

Art. 7 Stab da catastrofas

La suprastanza cumünala tscherna ün stab da catastrofas.

Il stab da catastrofas as cumpuona dals trais commembers, dal president dal stab e 2 ulteriurs commembers. Il stab da catastrofas tscherna ün president our da seis ravuogl.

La dürada d'uffizi dal stab da catastrofas nun es determinada. Schi segua üna desditta in scrit davart dals rapreschantants dal stab da catastrofas o davart da las autoritats cumünalas sto eleger la suprastanza cumünala novs rapreschantants.

Art. 8 Incumbenzas

Il stab da catastrofas ha d'accumplir tuot las lezchas chi sun fixadas i'l rom da l'incumbenza generala e chi nu sun chosa da la cumischiun da lavinas o d'ün oter organ cumünal.

Al stab da catastrofas suottastan impustüt:

- a) Güdichar la situaziun imnatschanta;
- b) Examinar la prontezza d'acziun e l'alarm;
- c) Prevenziun cun infuormar a la populaziun e serrar vias da trafic;
- d) Evacuar persunas e bes-chas our da territoris periclitats;
- e) Masüras da salvamaint e d'agüd;
- f) Preparar la documentaziun da l'acziun e'l quadern da dovairs;
- g) Scolaziun;
- h) Collavuraziun cun terzas persunas.

Las incumbenzas chi sun resalvadas als pumpiers a basa da las disposiziuns respectivas, il servezzan da salvamaint organisà tras la secziun CAS responsabla sco eir tuot las masüras preventivas i'l sector da territoris da skis e turas nu toccan i'l chomp d'incumbenzas dal stab da catastrofas.

B. Cumischiun da lavinas

Art. 9 Cumischiun da lavinas

La suprastanza cumünala tscherna üna cumischiun da lavinas.

La cumischiun da lavinas as cumpuona da trais commembers, dal president da la cumischiun e 2 ulteriurs commembers. La cumischiun da lavinas tscherna ün president our da seis ravuogl.

Als commembers da la cumischiun da lavinas suottastan ils seguaints trais chomps d'incumbenzas:

- a) Basa d'organisaziun e planisaziun, mezs finansials;
- b) Güdichar la situaziun da lavinas, material da salvamaint ;
- c) Infrastructura, comunicaziun, transport e material.

La cumischiun da lavinas vain per regla convochada da seis president. In cas da bsögn po eir ün commember ordinari pretender üna convocaziun.

Eventuals cusgliaders externs vegnan convochats dal president da la cumischiun tenor bsögn.

La dürada d'uffizi da la cumischiun da lavinas nun es determinada. Schi segua üna desditta in scrit davart dals rapreschantants da la cumischiun da lavinas o davart da las autoritats cumünalas sto eleger la suprastanza cumünala novs rapreschantants.

Art. 10 Incumbenzas e cumpetenzas

La cumischiun da lavinas pissera in cas da privel da lavinas per la protecziun da persunas e bes-chas, da chasas e bains illas fracziuns abitadas dal cumün. Sia incumbenza resulta da tuot las masüras chi sun necessarias per evitar accidaints da lavinas e chi sun da tour in cas d'accidaints da lavinas.

La cumischiun da lavinas güdichescha specialmaing:

- a) L'effet da las masüras applichadas fin uossa;
- b) La naiv frais-cha daspö l'ultima valütaziun;
- c) La temperatura e'l vent, la cuverta da naiv;
- d) Il bulletin da lavinas e las prognosas da l'ora;
- e) Ils mezs chi stan a disposiziun.

Ella po eir gnir consultada per cusgliar ils ulteriurs organs cumünals.

La cumischiun da lavinas nun es cumpetenta pel territori da turas o gianellas o oters sports d'inviern.

III. Masüras da l'organisaziun d'agüd in cas da catastrofas e l'oblig da surtour ils cuosts

Art. 11 Masüras

Il stab da catastrofas e la cumischiun da lavinas piglian in aigna respunsabilità tuot quellas masüras chi resultan dal chomp d'incumbenzas.

Per accumplir lur incumbenzas stan a disposiziun al stab da catastrofas ed a la cumischiun da lavinas tuot las resursas necessarias dal cumün.

Las disposiziuns dal stab da catastrofas e da la cumischiun da lavinas sun impegnativas per minchün e sun d'observar in mincha cas. Quai vala impustüt per serradas da via ed evacuaziuns. Il stab da catastrofas e la cumischiun da lavinas pon in cas da bsögn eir far adöver da la pussanza da la pulizia per pudair realisar lur incumbenza.

Art. 12 Infuormaziun

Il stab da catastrofas e la cumischiun da lavinas orienteschan a la suprastanza cumünala. In cas da bsögn vegnan orientats in merit eir ils organs respunsabels dal chantun e dals cumüns limitrofs (vaschins o pertocs).

Il stab da catastrofas e la cumischiun da lavinas tegnan rapport da lavur per mans da la suprastanza cumünala. In quel sun da nomnar :

- a) La lavur da la stagiun passada in general;
- b) Las masüras realisadas in successiun cronologica;
- c) Bloccadas da las vias d'access e da la via tras la val;
- d) Propostas per masüras architectonicas e da gestiun;
- e) Las spaisas e la repartiziun dals cuosts.

Art. 13 Oblig da surtour ils cuosts

Ils cuosts chi sun colliats cun las masüras ordinadas dal stab da catastrofas e da la cumischiun da lavinas van per regla a charg dal cumün.

Il cumün po inchargiar ils cuosts eir a persunas privatas, premiss cha la masüra es gnüda tutta in lur interess. Ils cuosts colliats cun evacuaziuns van adüna a charg da las persunas evacuadas. Per quant cha'l cumün ha fat prestaziuns preliminaras, po el dumandar inavo talas da las persunas evacuadas.

Schi nun es pussibel da s'abinar davart la repartiziun dals cuosts decida la suprastanza cumünala in merit i'l rom d'üna disposiziun contestabla.

Art. 14 Indemnisaziun e sgüranza

Il cumün indemnisescha a tuot ils commembers dal stab da catastrofas e da la cumischiun da lavinas confuorm al reglamaint da salarisaziun cumünal.

L'ingaschamaint d'impiegats cumünals ill' organisaziun d'agüd in cas da catastrofas o illa cumischiun da lavinas vain indemnisa be dadour il temp da lavur.

Ils commembers da l'organisaziun d'agüd in cas da catastrofas e da la cumischiun da lavinas sun sgürats tras il cumün d'ürant lur intervenziuns.

IV. Disposiziuns penalas e finalas

Art. 15 Disposiziuns penalas

Chi chi nun observa las disposiziuns dal stab da catastrofas e da la cumischiun da lavinas vain chastià cun üna multa da fin a frs. 3'000.00, in cas chi's repetan fin a frs. 6'000.00.

Art. 16 Execuziun

La suprastanza cumünala executescha quista ledscha e po decretar las disposiziuns executivas necessarias.

Art. 17 Vigur

La ledscha aintra in vigur davo sia approvaziun da la radunanza cumünala dals 24.03.2015.

Cun l'entrada in vigur da quista ledscha sun abolidas tuot las disposiziuns d'oters decrets chi stan in cuntradicziun cun tala.

Valsot, 24.03.2015

Pel cumün da Valsot

il capo:



il manader administraziun:

